

# Rasulullah Sebagai Panglima Perang

Junjungan agung Nabi Muhammad (S.A.W) bukan sahaja giat dan terkenal sebagai pengembang agama Islam yang tabah dan bertanggungjawab, malah beliau juga seorang panglima perang yang berani. Kalau dalam krisis di Vietnam Selatan kita bersua dengan taktik dua orang panglima yang saling mengatasi satu sama lain yaitu Jeneral Vo Nguyen Giap dan Jeneral William Westmoreland, dalam perang pembangkitan Islam telah lahir seorang jeneral yang benar-benar “leadership” dan banyak hal.

Oleh : Mas Iskandar

Jiwa ketenteraan Rasulullah sangat padu dan sukar untuk dinafikan oleh sesiapa pun.

Keberanian Baginda buka isapan jempol. Beliau tegas dan bersemangat waja.

Rasulullah dengan tegas bersabda: “Jika seorang Rasul telah memakai baju wajanya, ia tak akan membuat lagi sebelum Allah memberi ketentuan siapa yang akan menang di antara dia dan musuhnya. Allah akan memberi kamu kemenangan, jika kamu berperang dengan keberanian.”

Strategi peperangannya berencana dan berperai kemanusiaan. Beliau mengatur dengan cermat dan taktikal sekali.

Kalau kita mengkaji sejarah akan didapati Muhammad telah bersedia mengamalkan prinsip-prinsip peperangan secara umum. Kita akan dapati pasukannya mara, menggempur, serang balas, undur dan bertahan. Malahan beliau menyusun sendiri pentadbiran-pentadbiran semasa berperang. Beliau menyusun masa sembahyang, makan, rehat dan buat

perkhemahan dengan cermat agar memberi peluang kepada bala tenteranya beramal dan berperang dengan seimbang.

Bila sampai masanya yang terdesak beliau membuat ketetapan agar berjuang terus-menerus tanpa sembahyang dan berehat. Ini berlaku semasa pasukan Islam mengepung Banī Qurayzah beliau dapati pengikut-pengikutnya meletakkan senjata kerana hendak sembahyang Asar. Melihat itu Baginda lalu berseru:

“Barang siapa yang bersedia mendengar lagi taat, maka janganlah ia sembahyang Asar melainkan di kampung Banī Qurayzah.” (Ini bererti bukanlah Baginda melarang sama sekali tentera-tentera Muslimin mengerjakan sembahyang, tetapi Baginda memerintahkan supaya sembahyang Asar itu dita’khirkan hingga sampai di kampung Banī Qurayzah di mana matlamat perang akan ditujui – P.).

Satu perkara yang sangat membanggakan ialah beliau memimpin sendiri bala tenteranya berjuang di garisan hadapan. Dalam semua perang besar beliau tetap tidak ketinggalan.

Saranan-saranannya tegas dan tetap dikerjakan oleh pasukannya dengan patuh. Untuk meninggikan semangat, Nabi sering membawa isterinya guna memberi rawatan pejuang-pejuang yang mendapat luka dan menguruskan hal-hal makan mereka. Siti Aisyah dan Ummu Salamah pernah terlibat dalam beberapa peperangan yang dipimpin oleh Nabi. Di sini jelas Nabi telah dapat menjaga moral tenteranya dengan jayanya.

Beliau tidaklah monopoli segala ideal-idealnya berhubung dengan taktik-taktik perang. Pada tempat-tempat tertentu beliau menghormati pimpinan bersama ke arah kemenangan yang mantap dan berkesan. Saranan-saranan dari para Sahabat tetap dihormati.

Ketika kaum Quraisy mengepung Kota Madinah dalam Perang Khandak Salman Al-Farisi telah mendapat ideal dan lalu menyarankan kepada Nabi Muhammad agar menggali parit di keliling kota itu guna membanteras kemasukan tentera-tentera Musyrikin dengan leluasanya. Nabi dengan senang hati menerima cadangan yang berguna itu. Hasilnya berupa kemenangan yang cemerlang.

## Islam dan Ketenteraan

Disiplin amatlah penting dalam peperangan. Tentera yang tidak mengetahui perintah-perintah dan disiplin dari ketua-ketuanya, pasti menemui gejala-gejala di atas Rasulullah telah mengatur lima puluh tentera berpanah di atas jurang 'Aynūn sebagai kumpulan penyekat (*cart of party*). Mereka diperintah agar jangan pergi dari situ sebelum menerima perintah selanjutnya. Juga dilarang sama sekali mengambil barang-barang peninggalan musuh. Tetapi mereka telah mengingkari perintah tersebut. Kemenangan yang sepatutnya diperoleh telah menjadi sebaliknya.

Dalam aksi pihak Viet cong pada hari tahun baharu mereka sedikit masa yang lalu, kita dapat menatap di akhbar-akhbar betapa gambar seorang panglima Amerika dengan pistolnya menembak kepada seorang anggota Viet cong yang terikat kuat.

Itukah sifat peperangan yang *gentlemen*? Di manakah aspek-aspek kemanusiaan yang sering digembarkan oleh Washington?

Tetapi Rasulullah sebagai Panglima Tertinggi Tentera Islam tidaklah bertindak sekeji dan sepegecut demikian. Dalam pertempuran Baginda seperti tentera-tentera membunuh lawannya dengan gigih. Tetapi Baginda membuat perlakuan yang baik dapat para tawanannya. Pernah

Baginda mengangkat mereka sebagai guru mengajar kaum Muslimin menulis. Dengan menerima reaksi-reaksi tersebut ramai di antara mereka memeluk agama Islam dengan sedarnya. Begitu *gentlemen* sekali!

Bagaimana pandangan Rasulullah terhadap peperangan? Dalam sebuah hadithnya beliau menyarankan:

“Hai manusia, janganlah kamu bercita-cita untuk berhadapan dengan musuh (berperang). Bermohonlah kepada Tuhan supaya Tuhan berikan kesejahteraan, tetapi apabila kamu telah berhadapan dengan musuh (berada di dalam peperangan) maka bersabarlah dan hadapilah musuh-musuhmu dengan tenang. Ketahuilah, sesungguhnya syurga itu berada di bawah dentuman peperangan.”



Pemandangan di Kota “Masada” yang telah dirampas oleh tentera-tentera Israel di dalam Peperangan Arab – Yahudi pada bulan Jun tahun lalu, di mana kelihatan api sedang menjilat sebuah kem tentera-tentera Israel yang ditembak oleh meriam-meriam katak tentera-tentera Jordan yang berkawal di seberang Sungai Jordan, - (Gambar dipetik daripada “An-Nadwah” Makkah).